

SAMÞYKKT

um stjórnýslu og fundarsköp fyrir hreppsnefnd Reykhólahrepps.

I. KAFLI

Um skipan hreppsnefndar og verkefni hennar.

1. gr.

Hreppsnefnd Reykhólahrepps skal skipuð 5 hreppsnefndarmönnum kjörnum skv. III. kafla sveitarstjórnarlaga nr. 8/1986, sbr. 1. mgr. 10. gr. og 11. gr. sömu laga.

2. gr.

Starfstímabil hreppsnefndar hefst 15 dögum eftir kjördag og gildir til jafnlengdar að fjórum árum liðnum.

Hreppsnefnd fer með stjórn Reykhólahrepps samkvæmt ákvæðum sveitarstjórnarlaga og annarra laga.

Hreppsnefnd annast þau verkefni sem henni eru falin í lögum, reglugerðum og samþykktum og gætir hagsmuna hreppsins í hvívetna. Jafnframt skal hreppsnefndin vera í fyrirsvari fyrir sameiginleg velferðarmál hreppsþúa.

3. gr.

Aldursforseti nýkjörinnar sveitarstjórnar kveður hana til fyrsta fundar og stýrir fundi þar til oddviti hefur verið kjörinn.

Kjörtímabil oddvita og varaoddvita skal vera eitt ár miðað við fyrsta fund í júní ár hvert.

Sá er rétt kjörinn oddviti sem fengið hefur atkvæði meirihluta hreppsnefndarmanna.

4. gr.

Hreppsnefnd kýs í nefndir og ráð samkvæmt fundarsköpum sínum eða eftir því sem lög mæla fyrir um.

Oddviti eða sá sem hann ákveður annast boðun fyrsta fundar nefnda og stýrir kjöri nefndarformanns.

5. gr.

Hreppsnefnd setur þær samþykktir og gjaldskrár sem lög mæla fyrir um og þörf krefur.

II. KAFLI

Um fjármálastjórn hreppsins.

6. gr.

Hreppsnefnd skal semja þriggja ára áætlun um rekstur, framkvæmdir og fjármál hreppsins, sem skal vera til leiðbeiningar við gerð árlegrar fjárhagsáætlunar hans.

Árleg fjárhagsáætlun hreppssjóðs og stofnana hreppsins skal liggja fyrir eigi síðar en í lok janúar ár hvert.

Form fjárhagsáætlunar skal vera í samræmi við form ársreikninga hreppsins og skal þar greint á milli rekstrar, fjárfestinga og fjármagnshreyfinga.

Við afgreiðslu fjárhagsáætlunar tekur hreppsnefnd ákvörðun um tekjustofna og tekjuöflun og um öflun lánsfjár á árinu.

Fjárhagsáætlun ársins skal vera meginregla um fjármálastjórn hreppsins á árinu.

Taki hreppsnefnd ákvörðun um að stofna til útgjalda umfram það sem kveðið er á um í fjárhagsáætluninni, skal hún jafnframt taka ákvörðun um hvernig afla skuli fjár til þeirra útgjalda svo sem með lækkun annarra útgjalda, auknum tekjum eða lánsfé.

Árlega fjárhagsáætlun má endurskoða og skal slíkri endurskoðun lokið eigi síðar en 15. október.

7. gr.

Hreppsnefnd skal hafa lokið fullnaðarafgreiðslu ársreikninga hreppssjóðs eigi síðar en í júnílok ár hvert skv. 88. gr. sveitarstjórnarlaga, sbr. 82. og 83. gr. sömu laga.

Eintök af ársreikningum skulu hafa borist Hagstofu Íslands og félagsmálaráðuneyti fyrir 31. júlí ár hvert.

8. gr.

Skoðunarmenn skulu árita ársreikninginn og greina frá niðurstöðu endurskoðunar sinnar og láta í ljós álit á ársreikningnum.

Sveitarstjórn skal einnig ráða löggiltan endurskoðanda til ráðuneytis og aðstoðar við gerð ársreiknings og fjármálastjórn að öðru leyti.

III. KAFLI

Um framkvæmdastjórn og starfslið hreppsins.

9. gr.

Hreppsnefnd getur ráðið sveitarstjóra er hefur með höndum daglega stjórn sveitarfélagsins, annast framkvæmd ákvarðana sveitarstjórnar og sér um og stjórnar daglegum rekstri skrifstofu hreppsins.

Ráðningartími sveitarstjóra skal að jafnaði vera hinn sami og kjörtími sveitarstjórnar. Starfskjör sveitarstjóra skal ákveða í ráðningarsamningi.

10. gr.

Sveitarstjóri fer með prókúrumboð sveitarsjóðs og er æðsti yfirmaður annars starfsliðs sveitarfélagsins.

Jafnframt skal sveitarstjóri hafa á hendi eftirtalin verkefni:

- a. Hann undirbýr fundi sveitarstjórnar í samráði við oddvita.
- b. Hann undirritar skjöl varðandi kaup og sölu fasteigna sveitarfélagsins, lántökur og ábyrgðir, svo og önnur skjöl sem fela í sér skuldbindingar eða ráðstafanir sem samþykki sveitarstjórnar þarf til.
- c. Hann sér um og annast ráðningu á öðru starfsliði sveitarfélagsins í samræmi við stefnu-mörkun sveitarstjórnar um verkefni sveitarfélagsins.
- d. Hann gerir tillögur til sveitarstjórnar um þau málefni sem koma upp í hans starfi og þarfnast umfjöllunar og ákvörðunar sveitarstjórnar.
- e. Hann er ábyrgðarmaður gjaldheimtu og reikningshalds sveitarsjóðs.

IV. KAFLI

Fundarsköp hreppsnefndar.

11. gr.

Hreppsnefnd heldur reglulega fundi einu sinni í mánuði og skal hreppsnefnd í upphafi kjörtímabils ákveða fundartíma nánar.

Heimilt skal þó að fella niður reglulega fundi allt að þrisvar á ári.

Ákveði hreppsnefnd að fella niður reglulega fundi skal hún tilnefna tvo menn úr hópi hreppsnefndarmanna sem séu sveitarstjóra til ráðuneytis um afgreiðslu mála á þeim tíma.

Hreppsnefndarmanni er skylt að sækja hreppsnefndarfundi nema lögmæt forföll hamli

svo sem önnur brýnni skyldustörf eða veikindi. Sé hreppsnefndarmaður forfallaður um stundarsakir skal hann tilkynna eða láta tilkynna forföllin til oddvita (sveitarstjóra) sem boðar þá varamann á fund skv. 2. mgr. 32. gr. sveitarstjórnarlaga. Hreppsnefndarmanni sem forfallast um stundarsakir er heimilt að ákveða hver varamanna hans skuli taka sæti á hreppsnefndarfundi eða tekur varamaður sæti samkvæmt ákvæðum 1. og 2. mgr. 35. gr. sveitarstjórnarlaga.

Sveitarstjóri skal sitja fundi hreppsnefndar með málfrelsi og tillögurétt, en ekki atkvæðisrétt nema hann sé kjörinn hreppsnefndarmaður.

Hreppsnefnd getur heimilað að maður utan hreppsnefndar kveði sér hljóðs á hreppsnefndarfundi.

Hreppsbúum skal kunngert með auglýsingu hvar og hvenær hreppsnefndarfundir eru haldnir.

12. gr.

Sveitarstjóri í samráði við oddvita semur dagskrá hreppsnefndarfunda.

Á dagskrá hreppsnefndarfunda skal taka:

- a. Lögákveðnar kosningar, svo sem kosningar oddvita hreppsnefndar, kosningar nefnda, skoðunarmanna og ráðningu sveitarstjóra.
- b. Fundargerðir nefnda að svo miklu leyti sem hreppsnefnd þarf að samþykkja ályktanir sem í þeim felast.
- c. Önnur mál sem falla undir verksvið hreppsnefndar.

Hreppsnefndarmaður sem óskar að fá mál tekið á dagskrá hreppsnefndarfundar skal tilkynna það sveitarstjóra eða oddvita með skriflegri tillögu eða fyrirspurn nægjanlega tímanlega til að boða megi málið með dagskrá.

Dagskrá hreppsnefndarfunda skulu fylgja afrit fundargerða, tillagna og annarra gagna sem sveitarstjóri eða oddviti telja nauðsynleg til skýringar á dagskrármálum.

13. gr.

Reglulegir hreppsnefndarfundir skulu boðaðir með tveggja sólarhringa fyrirvara og skal dagskrá að jafnaði fylgja fundarboði. Heimilt skal þó að boða hreppsnefndarfund símleiðis enda sé þá greint frá meginatriðum dagskrár fundarins.

Aukafundi í hreppsnefnd má boða símleiðis á sama hátt með sólarhrings fyrirvara.

Hreppsnefndarfundur er lögmætur ef meira en helmingur hreppsnefndarmanna er á fundi.

Hreppsnefnd getur enga bindandi ályktun gert nema fundur sé lögmætur.

Sveitarstjóri skal að jafnaði rita fundargerð hreppsnefndarfunda. Oddviti getur þó tilnefnt annan fundarritara ef þörf krefur.

14. gr.

Hreppsnefndarfundir skulu haldnir í heyranda hljóði og almenningi heimilaður aðgangur að þeim eftir því sem húsrúm leyfir.

Hreppsnefnd getur ákveðið að einstök mál verði rædd fyrir luktum dyrum og einnig getur hreppsnefnd ákveðið að hreppsnefndarfundur sem eingöngu fjallar um viðkvæm einkamál manna eða viðskiptamál skuli haldinn fyrir luktum dyrum.

Tillaga um að mál skuli rædd fyrir luktum dyrum skal afgreidd umræðulaust í hreppsnefnd.

Óheimilt er að skýra frá því sem fram kemur við umræður á lokuðum fundi í hreppsnefnd.

15. gr.

Oddviti hreppsnefndar stýrir fundum hennar. Hann setur fund, kannar lögmæti hans og stjórnar afgreiðslum mála, sér um að fundargerðir séu færðar og slítur fundi þegar dagskrá er tæmd.

Oddviti úrskurðar um skilning á fundarsköpum, en skjóta má úrskurði hans til úrlausnar hreppsnefndar sem fellir úrskurð sinn umræðulaust.

Oddviti sér um að allt fari skipulega og löglega fram á hreppsnefndarfundum og er hreppsnefndarmönnum skylt að lúta valdi hans að því er varðar fundarsköp og góða reglu.

Raski áheyrandi fundarfríði getur oddviti vísað honum úr fundarsal. Leyfi oddvita þarf til að taka myndir og hljóðrita umræður á hreppsnefndarfundum.

16. gr.

Mál skulu tekin til umræðu og afgreidd í hreppsnefnd í þeirri röð sem þau eru á dagskrá nema oddviti eða hreppsnefnd ákveði annað.

Heimilt er að taka til meðferðar á hreppsnefndarfundum mál sem ekki hefur verið á dagskrá ef 2/3 viðstaddra hreppsnefndarmanna samþykkja slík afbrigði.

17. gr.

Hreppsnefnd afgreiðir mál að jafnaði við eina umræðu. Þó skal hafa tvær umræður með a.m.k. einnar viku millibili um eftirtalin málefni:

- a. Fjárhagsáætlun hreppsins.
- b. Ársreikninga hreppsins og fyrirtækja hans.
- c. Samþykktir, reglugerðir og gjaldskrár, sem hljóta eiga staðfestingu ráðherra.
- d. Áætlanir fyrir hreppinn sem gilda eiga til lengri tíma, svo sem þriggja ára áætlanir og skipulagsáætlanir.
- e. Beiðni um fjárhagsaðstoð skv. 90. gr. sveitarstjórnarlaga.

18. gr.

Hreppsnefndarmanni er skylt að sækja hreppsnefndarfundum nema lögmæt forföll hamli svo sem önnur brýnni skyldustörf eða veikindi. Sé hreppsnefndarmaður forfallaður um stundarsakir skal hann tilkynna eða láta tilkynna forföllin til oddvita (sveitarstjóra) sem boðar þá varamann á fund skv. 2. mgr. 32. gr. sveitarstjórnarlaga.

Hreppsnefndarmanni sem forfallast um stundarsakir er heimilt að ákveða hver varamanna hans skuli taka sæti á hreppsnefndarfundum ella tekur varamaður sæti samkvæmt ákvæðum 1. og 2. mgr. 35. gr. sveitarstjórnarlaga.

19. gr.

Hreppsnefndarmaður hefur málfrelsi, tillögurétt og atkvæðisrétt á fundum hreppsnefndar.

Hreppsnefndarmaður sem taka vill til máls skal óska heimildar oddvita.

Hreppsnefndarmanni ber að víkja sæti við umræður og afgreiðslu máls þegar það varðar hann sjálfan, skyldmenni eða nána venslamenn hans svo sérstaklega að almennt má ætla að viljaafstaða hans mótist að einhverju leyti af því. Hreppsnefnd sker umræðulaust úr hvort mál er svo vaxið.

Hreppsnefndarmaður sem hlut á að máli má taka þátt í atkvæðagreiðslu um hæfi sitt.

Hreppsnefndarmanni sem veit hæfi sitt orka tvímælis ber að skýra oddvita hreppsnefndar frá því.

Hreppsnefndarmaður sem vanhæfur er við úrlausn máls skal yfirgefa fundarsal hreppsnefndar við umræðu og afgreiðslu þess.

20. gr.

Hreppsnefndarmaður skal standa við sæti sitt eða ganga til ræðustóls þegar hann flytur mál sitt og beina máli sínu til oddvita.

Hreppsnefndarmaður má tala tvisvar við hverja umræðu máls. Heimilt er þó hreppsnefndarmanni að taka oftari til máls til að bera af sér ámæli eða til að gera stutta athugasemd við fundarsköp.

Sveitarstjóri eða flutningsmaður tillögu mega þó tala oftari en tvisvar við hverja umræðu máls.

Ekki má hreppsnefndarmaður lesa upp prentað mál við umræður í hreppsnefnd nema með leyfi oddvita.

21. gr.

Beri hreppsnefndarmaður aðra menn brigslum skal oddviti víta hann.

Oddviti getur lagt til við hreppsnefnd að hreppsnefndarmaður sem víttur hefur verið tvisvar á sama fundi verði sviptur málfrelsi á þeim fundi. Skal slík tillaga afgreidd umræðulaust.

Hljóðnist hreppsnefndarmaður ekki úrskurði oddvita eða hreppsnefndar eða ef óregla kemur upp á fundi skal oddviti gera fundarhlé, fresta fundi eða slíta fundi ef nauðsyn krefur.

22. gr.

Telji oddviti umræður dragast úr hófi fram getur hann lagt fram dagskrártillögu um að ræðutími hvers hreppsnefndarmanns verði takmarkaður, umræðum verði lokið á tilteknum tíma eða umræðum um mál verði lokið nú þegar. Hver hreppsnefndarmaður getur og borið fram slíka tillögu. Hreppsnefnd afgreiðir tillögur um takmörkun ræðutíma umræðulaust. Ekki má þó takmarka umræðu um mál svo að hún standi skemur en tvær klukkustundir ef einhver hreppsnefndarmaður kveður sér hljóðs.

Umræður um fjárhagsáætlun eru ekki háðar ákvæðum þessarar greinar.

23. gr.

Hreppsnefndarmaður getur borið fram breytingartillögu, viðaukatillögu, frávisunartilögu eða frestunartillögu við hvert það mál sem til umræðu er á fundi. Slíkar tillögur skulu vera skriflegar ef oddviti óskar. Oddviti ákveður í hvaða röð og með hvaða hætti slíkar tillögur eru teknar til afgreiðslu.

24. gr.

Mál er afgreitt í hreppsnefnd með því að samþykkja það eða fella það, vísa því frá hreppsnefnd eða vísa því til afgreiðslu nefndar, sveitarstjóra og/eða oddvita.

Máli sem hreppsnefnd ber að lögum að afgreiða verður þó eigi vísað til afgreiðslu annarra.

Þá er hreppsnefnd heimilt að fresta afgreiðslu máls, nema um sé að ræða mál sem að lögum ber að afgreiða fyrir tiltekinn tíma.

25. gr.

Atkvæðagreiðsla á hreppsnefndarfundum fer að jafnaði fram með handauppréttingu.

Oddviti getur ákveðið að mál verði afgreitt með nafnakalli. Einnig ber oddvita að láta fara fram nafnakall ef a.m.k. þriðjungur hreppsnefndarmanna óskar þess.

Við nafnakall skal oddviti greiða atkvæði síðastur. Við nafnakall svarar hreppsnefndarmaður, þegar oddviti les upp nafn hans, já eða nei, eftir því hvort hann er með máli eða móti eða tekur fram að hann greiði ekki atkvæði, en slík afstaða telst þó þátttaka í atkvæðagreiðslunni.

Heimilt er að afgreiða mál með skriflegri atkvæðagreiðslu ef hreppsnefndarmaður óskar og hreppsnefnd samþykkir.

Kosningar skulu ávallt vera skriflegar og leynilegar.

26. gr.

Við atkvæðagreiðslu ræður einfaldur meirihluti atkvæða úrslitum máls nema öðruvísi sé ákveðið í lögum. Verði atkvæði jöfn með máli og móti fellur það.

Kosningar sem fram fara í hreppsnefnd skulu vera hlutfallskosningar skv. d'Hondts reglu sbr. 16. og 17. gr. sveitarstjórnarlaga.

27. gr.

Hreppsnefnd getur ráðið sérstakan fundarritara utan hreppsnefndar til að annast ritun fundargerða í gerðabók hreppsnefndar. Í fundargerð skal getið hvar og hvenær fundur er haldinn og hverjir sitji fundinn. Skrá skal þau mál sem tekin eru fyrir, dagsetningu þeirra, aðila máls og meginefni og hvaða afgreiðslu þau fá.

Sé mál ekki afgreitt samhljóða skal greina í fundargerð hvernig atkvæði hafa skipst.

Mál sem tekin eru fyrir á lokuðum fundi skal skrá sem trúnaðarmál.

Hreppsnefndarmaður á rétt á að fá bókaða stutta athugasemd um afstöðu sína til máls sem til meðferðar er í hreppsnefnd.

Í lok fundar skal fundargerð lesin upp og skulu allir viðstaddir hreppsnefndarmenn undirrita hana.

Hreppsnefndarmaður sem gera vill athugasemd við eitthvert atriði í fundargerð getur undirritað fundargerðina með fyrirvara um það atriði.

Hreppsnefnd getur ákveðið að umræður á hreppsnefndarfundum skuli hljóðritaðar eða teknar upp með öðrum hætti. Verði það ákveðið skal hreppsnefnd setja um það nánari reglur.

V. KAFLI

Um kjör í nefndir, ráð og stjórnir.

28. gr.

Hreppsnefnd kýs fulltrúa í nefndir samkvæmt ákvæðum laga, reglugerða og samþykktar þessarar. Slíkar kosningar skulu vera leynilegar, bundnar hlutfallskosningar ef einhver hreppsnefndarmanna óskar þess.

Forstöðumenn og stjórnendur fyrirtækja og stofnana hreppsins eru ekki kjörgengir í stjórnir þeirra stofnana sem þeir starfa hjá.

29. gr.

Oddviti/sveitarstjóri boðar nefnd saman til fyrsta fundar. Á þeim fundi skal kjósa formann, varaformann og ritara nefndar, nema lög ákveði annað.

Formaður nefndar boðar eða lætur boða fundi í nefnd að jafnaði með a.m.k. eins sólarhrings fyrirvara.

Nefndarmanni er skylt að sækja fundi nema lögmæt forföll hamli. Þegar aðalmaður í nefnd forfallast um stundarsakir skal varamaður hans taka sæti í nefndinni.

Þegar aðalmaður í nefnd flyst burt úr hreppnum, fellur frá eða forfallast á annan hátt varanlega, tekur varamaður hans sæti nema hreppsnefnd ákveði að kjósa aðalmann að nýju.

30. gr.

Nefndarfundur skal haldinn fyrir luktum dyrum. Nefnd getur kvatt á sinn fund einstaka starfsmenn hreppsins. Ennfremur getur nefnd boðið aðila að koma á sinn fund til viðræðna um tiltekin mál.

Formaður nefndar stýrir fundum. Ákvæði IV. og VI. kafla samþykktar þessarar gilda um meðferð mála í nefndum, ráðum og stjórnnum hreppsins, eftir því sem við á.

31. gr.

Um hlutverk og valdsvið nefnda og ráða á vegum hreppsins fer eftir því sem ákveðið er í lögum, reglugerðum eða samþykktum hreppsnefndar.

Hreppsnefnd getur falið nefnd fullnaðarafgreiðslu máls nema slíkt vald sé að lögum falið hreppsnefnd.

Nefndir og ráð hreppsins skulu halda gerðabækur. Í fundargerð skal skrá hvar og hvenær fundur er haldinn og hverjir sitji hann. Þá skal í fundargerð skrá einstök mál sem tekin eru fyrir á fundi, dagsetningu þeirra, nöfn aðila, meginefni og hvaða afgreiðslu þau hljóta.

Fundargerð skal lesin upp í lok fundar og viðstaddir nefndarmenn undirrita hana.

32. gr.

Fundargerðir nefnda og ráða hreppsins skulu að jafnaði teknar á dagskrá hreppsnefndar og skal það gert svo fljótt sem unnt er að afloknum nefndarfundum.

Ályktun nefndar eða ráðs sem hefur í för með sér útgjöld skal ætíð lögð fyrir hreppsnefnd til endanlegrar afgreiðslu.

33. gr.

Hreppsnefnd kýs í eftirtaldar nefndir, ráð og stjórnir sem fara með eftirtalin verkefni skv. 6. gr. sveitarstjórnarlaga nr. 8/1986:

A. **Til eins árs.** Á fundi í júní ár hvert:

1. Oddvita og varaoddvita.
2. *Skoðunarmenn.* Tveir aðalmenn og tveir til vara skv. 84. gr. laga nr. 8/1986.
3. *Undirkjörstjórn við alþingiskosningar.* Þrír aðalmenn og þrír til vara skv. 10. gr. laga nr. 80/1987 um kosningar til Alþingis.

B. **Til fjögurra ára.** Á fyrsta eða öðrum fundi að afloknum kosningum:

1. *Kjörstjórn við sveitarstjórnarkosningar.* Þrír aðalmenn og þrír til vara skv. 23. gr. sveitarstjórnarlaga nr. 8/1986.
2. *Félagsmálaráð.* Þrír aðalmenn og þrír til vara.

Verkefni ráðsins eru:

Félagsmál, framfærslumál, aðstoð við aldraða og fatlaða, barnaverndarmál, varnir gegn notkun vímuefna, rekstur félagsheimila, rekstur sundlaugar og útivistarsvæða, rekstur heimilishjálpar.

3. *Byggingar- og atvinnumálanefnd.* Þrír aðalmenn og þrír til vara.

Verkefni nefndarinnar eru:

Atvinnumál, atvinnuleysissskráning, húsnæðismál, verkamannabústaðir, leiguíbúðir, landbúnaðarmál, forðagæsla, eyðing refa og minka, meindýraeyðing, fjallskilamál, skipulags- og byggingarmál, bygging og viðhald mannvirkja, hafnarmál.

4. *Mennta- og menningarmálanefnd.* Þrír aðalmenn og þrír til vara.

Verkefni nefndarinnar eru:

Menntamál, rekstur grunnskóla, rekstur tónlistarskóla, fullorðinsfræðsla, rekstur bókasafna, rekstur leikskóla, íþróttir og útivera.

5. *Almannavarna- og öryggismálanefnd.* Tveir aðalmenn og tveir til vara. Sveitarstjóri/oddviti er sjálfkjörinn.

Verkefni nefndarinnar eru:

Almannavarnir og öryggismál, eldvarnir, slökkvilið.

6. *Heilbrigðisnefnd*. Þrír aðalmenn og þrír til vara.
Verkefni nefndarinnar eru:
Umhverfismál, hreinlætismál, sorphirða og sorpeyðing, náttúruvernd, heilbrigðisefirlit, fegrunarmál.
7. *Stjórn heilsugæslustöðvar og Barmahlíðar*. Þrír aðalmenn og þrír til vara. Kjörnir úr hópi kjörinna hreppsnefndarmanna. Oddviti er sjálfkjörinn formaður.
Verkefni nefndarinnar eru:
Heilsugæsla, rekstur heilsugæslustöðvar, rekstur Barmahlíðar, almenn heilsuvernd.

VI. KAFLI

Um réttindi og skyldur hreppsnefndarmanna.

34. gr.

Hreppsnefndarmanni ber að gegna störfum sínum í hreppsnefnd af alúð og samvisku-semi og gæta hagsmuna hreppsins, en í störfum sínum er hreppsnefndarmaður einungis bundinn af lögum og sannfæringu sinni.

Hreppsnefndarmaður skal gæta þagnarskyldu um það sem hann fær vitneskju um í starfi sínu og leynt á að fara vegna einka- eða almannahagsmuna samkvæmt lögum, eðli máls eða sérstakri ákvörðun hreppsnefndar.

Nú telur hreppsnefndarmaður sig ekki geta gegnt skyldum sínum í hreppsnefnd án óhæfilegs álags og getur hreppsnefnd þá létt af honum störfum eða veitt honum lausn að eigin ósk um tiltekinn tíma eða til loka kjörtímabils. Varamaður tekur þá sæti hans skv. 18. gr. samþykktar þessarar.

35. gr.

Hreppsnefndarmaður á aðgang að bókum og skjölum hreppsins og einnig óhindraðan aðgang að stofnunum hans á venjulegum afgreiðslutíma til upplýsingaöflunar vegna starfa sinna.

Hreppsnefndarmaður skal fá þóknun fyrir störf sín í hreppsnefnd.

Hreppsnefndarmaður sem þarf að fara um langan veg milli heimilis og fundarstaðar skal auk þess fá greiddan ferðakostnað.

Haga skal fundum hreppsnefndar þannig að hreppsnefndarmaður eigi möguleika á að taka sér orlof árlega, sbr. 11. gr. samþykktar þessarar.

36. gr.

Ákvæði þessa kafla um réttindi og skyldur hreppsnefndarmanna svo og hliðstæð ákvæði í fundarsköpum hreppsnefndar gilda einnig um varamenn sem sitja hreppsnefndarfundi.

Samþykkt þessi, sem hreppsnefnd Reykhólahrepps hefur sett samkvæmt ákvæðum 3. mgr. 7. gr. og 49. gr. sveitarstjórnarlaga nr. 8/1986, staðfestist hér með til að öðlast gildi að loknum sveitarstjórnarkosningum í maí 1998. Þó skal 1. gr. samþykktarinnar taka gildi nú þegar þannig að í sveitarstjórnarkosningum í maí 1998 verði kjörnir 5 aðalmenn í hreppsnefnd Reykhólahrepps. Við gildistöku samþykktar þessarar fellur úr gildi samþykkt um stjórn og fundarsköp Reykhólahrepps nr. 549/1987.

Félagsmálaráðuneytinu, 18. febrúar 1998.

F. h. r.

Húnbogi Þorsteinsson

Sesselja Árnadóttir.